

ԱՐՏՈՒՏԻ ԵՐԳԸ

(Ժողովրդական ավանդույթուն)

- Մի մարդ տեսավ գարնան մարգում
Վեր ճախրելով,
Ճըռվողելով,
Ոնց էր արտուտն անուշ երգում:
- 5 «Սա որ, ասավ, էս վայրի տեղ
Երգ է ասում էսքան շքեղ,
Հապա թե մեր տանը լինի
Ի՛նչ դրախտի ձայն կըհանի»:
- 10 Ու ներշնչման տենդի միջին
Բռնեց մարգի սիրուն երգչին,
Տարավ փակեց նեղ վանդակում.
— Տեսեք, հիմի ոնց է երգում:
Բայց ի՛նչ, գերի, վանդակի մեջ.
Թըռչնակը լուռ նայում էր խեղճ
- 15 Հեռո՛ւ-հեռո՛ւ ճոխ մարգերին.
Միտն էր բերում կյանքը նախկին,
Երբ որ ազատ,
էն ցողապատ
Թարմ արոտում,
- 20 Թավիշ խոտում
Ման էր գալի,
Սորոլ տալի...
Միտն էր բերում,
Տըխրո՛ւմ, տըխրո՛ւմ,
- 25 Ու հառաչում,
Ցավոտ ճըշում

- Մաշող կարոտն ազատության,
«Վա՛յ, վաթա՛ն... վա՛յ, վաթա՛ն»:
— Գուցե սրա կուտն է աղքատ
- 30 Կամ թե փայտե վանդակն է վատ,
Որ իր զըվարթ երգը թողեց:
Միտք արավ տերն ու ողջ փոխեց,
Փայտե կոպիտ հին բանտի տեղ
Ոսկի վանդակ շինեց շըքեղ
- 35 Ու կերակուրն, էն օրից վեր,
Արավ շաքար ու թանկ մըրգեր:
Սակայն մարգի քընքուշ գերին
Մըտիկ չարավ թանկ մըրգերին:
Ոսկի բանտից՝ նեղ ու խավար,
- 40 Սըլանում էր միտքն անդադար
Դեպ վե՛ր, դեպ վե՛ր...
Ու հիշում էր,
Թե մայիսի
Արշալույսի
- 45 Ջինջ երկընքում
Ո՛նց էր երգում,
Խորո՛ւնկ, անվե՛րջ,
Լույս ծովի մեջ
Անփույթ լողում,
- 50 Խընդում, խաղում...
Միտն էր բերում,
Տըխրո՛ւմ, տըխրո՛ւմ,
Ու էն կյանքի հուր կարոտով,
Նեղ վանդակում, կոտրած սըրտով
- 55 Հընչում էր ողբն իր գերության.

- «Վա՛յ, վաթա՛ն... վա՛յ, վաթա՛ն...»
— Ո՞րն է սրա լավ վաթանը,
Որ չի կենում իր ճոխ տանը,
Ո՛չ մի ուրախ երգ է երգում
60 էս ոսկեղեն թանկ վանդակում:
Ասավ տերը ու ետ տարավ՝
Թողեց հանդում: Գերին թըռավ,
Կարոտալի մըտավ էն պերճ
Ծաղիկների, խոտերի մեջ:
65 Ապա վերև,
Դեպի արև
Ճախրեց, խընդաց.
Օդում թընդաց,
Հոսեց երգը... Սակայն նորեն
70 էլ առաջվա երգը չէր էն...

- Ու էն օրից
Ջինջ այերից
Ջիլ, թրթռուն
Ինչ էլ երգի,—
75 Արև, գարուն,
Բույրը մարգի,—
Նըրա զըվարթ, հընչուն երգում
Դեռ լալիս է ու հեկեկում
Հիշատակը իր գերության
80 «Վա՛յ, վաթա՛ն... վա՛յ, վաթա՛ն...»